

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06 i 51/09), a vezi sa članom 171. stav (1) alineja 3. Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Kantona Sarajevo“, broj: 38/14 – Prečišćeni tekst, 38/16, 44/17, 28/18, 52/21 i 40/22) i člana 26. i 84. stav (1) Statuta Općine Stari Grad Sarajevo („Službene novine Kantona Sarajevo“, broj: 20/24), Općinsko vijeće Stari Grad Sarajevo na 38. redovnoj sjednici, održanoj dana \_\_\_\_\_2024. godine, donijelo je

(N a c r t)

**P R A V I L N I K**  
**O OSTVARIVANJU PRAVA NA JEDNOKRATNU NOVČANU POMOĆ**  
**OBOLJELIM OD CELIJAKIJE**

**I – OPĆE ODREDBE**

**Član 1.**  
**(Predmet Pravilnika)**

Pravilnikom o ostvarivanju prava na jednokratnu novčanu pomoć oboljelim od celijakije (u daljem tekstu: Pravilnik) utvrđuju se način, ulovi i iznos jednokratne novčane pomoći, te postupak za ostvarivanje prava na jednokratnu novčanu pomoć.

**II – KORISNICI PRAVA I FINANSIRANJE**

**Član 2.**  
**(Pravo na ostvarivanje jednokratne novčane pomoći)**

Pravo na jednokratna novčana pomoć mogu ostvariti lica oboljela od celijakije uz ispunjavanje sljedećih uslova:

- 1) da je lice državljanin Bosne i Hercegovine;
- 2) da lice ima prijavljeno prebivalište na području Općine Stari Grad Sarajevo najmanje 1 (jednu) godinu prije podnošenja zahtjeva na javni poziv iz člana 4. ovog Pravilnika.

**Član 3.**  
**(Sredstva)**

- (1) Sredstva za dodjelu jednokratne novčane pomoći oboljelim od celijakije utvrđuju se u Budžetu Općine Stari Grad Sarajevo (u daljem tekstu: Budžet Općine) za svaku kalendarsku godinu.
- (2) Raspodjela novčanih sredstava za ove namjene vršit će se u skladu sa raspoloživim sredstvima u Budžetu Općine za ove namjene.

**Član 4.**  
**(Javni poziv i potrebna dokumentacija)**

- (1) Sredstva sa budžetske pozicije predviđena za ove namjene dodjeljuju se na osnovu javnog poziva koji se objavljuje na web stranici Općine i ostaje otvoren do kraja kalendarske godine ili do utroška planiranih budžetskih sredstava.
- (2) Jednokratna novčana pomoć utvrđena ovim Pravilnikom dodjeljivat će se na osnovu podnesenih zahtjeva, a u skladu sa objavljenim javnim pozivom.
- (3) Uz zahtjev iz stava (2) ovog člana, obavezno se prilaže sljedeća dokumentacija (original ili ovjerena fotokopija):
  - 1) Izvod iz matične knjige rođenih;
  - 2) Uvjerenje o državljanstvu (ne starije od 6 mjeseci);
  - 3) Uvjerenje o kretanju – prebivalištu (ne starije od 3 mjeseca);
  - 4) Dokaz, odnosno nalazi izdati od strane zdravstvene javne ustanove iz kojih je vidljivo da podnosilac zahtjeva boluje od celijakije (ne stariji od 3 mjeseca).
- (4) Zahtjevi za ostvarivanje prava na jednokratnu novčanu pomoć podnose se nadležnoj službi za poslove socijalne zaštite putem protokola Općine.

**Član 5.**  
**(Postupak za ostvarivanje prava)**

- (1) Pravo na dodjelu jednokratne novčane pomoći oboljelim od celijakije, korisnici mogu ostvariti jednom u toku kalendarske godine u iznosu od 700,00 KM za kupovinu bezglutenskih prehrambenih proizvoda, uz ispunjavanje uslova iz člana 2. ovog Pravilnika.
- (2) Nakon provedenog postupka utvrđivanja ispunjavanja svih propisanih uslova, Općinski načelnik, putem nadležne Službe, donosi rješenje o ostvarivanju prava na jednokratnu novčanu pomoć za lice koji je ispunilo sve propisane uslove u skladu sa ovim Pravilnikom.
- (3) Na osnovu rješenja iz stava (1) ovog člana, lice ostvaruju pravo na direktnu uplatu dodijeljenih sredstava iz budžeta Općine za tekuću kalendarsku godinu.
- (4) Zahtjevi koji ne ispunjavaju uslove za dodjelu novčanih sredstava, kao i zahtjevi podneseni nakon utroška sredstava predviđenih za jednokratnu novčanu pomoć licima oboljelim od celijakije, odbijaju se kao neosnovani rješenjem Općinskog načelnika putem nadležne Službe.
- (5) Protiv rješenja iz stava (1) i (3) ovog člana, može se izjaviti žalba Drugostepenoj stručnoj komisiji Općine Stari Grad Sarajevo, u roku od 15 (petnaest) dana od dana prijema rješenja.

**III – OBAVEZE KORISNIKA**

**Član 6.**  
**(Pravdanje dodjeljenih finansijskih sredstava)**

- (1) Korisnici koji su ostvarili pravo na jednokratnu novčanu pomoć, obavezni su do kraja kalendarske godine za koju su ostvarili pomoć, da dostave original ili ovjerene kopije fiskalnih računa, uplatnica ili faktura iz kojih je vidljivo da su dodijeljena sredstva utrošena za kupovinu bezglutenskih prehrambenih proizvoda.
- (2) Korisnici koji ne budu u prethodno navedenom roku opravdali dodijeljena sredstva, ista će biti u obavezi vratiti na transakcijski račun Općine.

(3) Ukoliko sredstva ne budu vraćena, ista će se potraživati putem Pravobranilaštva Općine kod nadležnog suda.

#### **IV – OBAVEZE NADLEŽNE SLUŽE**

##### **Član 7. (Obaveze nadležne službe)**

Nadležna služba za socijalnu zaštitu dužna je pratiti ostvarivanje prava na dodjelu jednokratne novčane pomoći oboljelim od celijakije, na propisan način voditi evidenciju i dokumentaciju o ostvarivanju predmetnog prava, kao i evidenciju pravdanja utrošenih sredstava za namjenu za koju su dodijeljena, te pratiti usklađivanje Budžeta Općine sa potrebnim sredstvima za ostvarivanje prava.

##### **Član 8. (Obrasci zahtjeva po Javnom pozivu)**

Nadležna služba će s ciljem pomoći korisnicima prava po ovom Pravilniku izraditi obrasce zahtjeva na javni poziv iz člana 4. ovog Pravilnika sa popisom i nazivom potrebne dokumentacije, a koji će činiti sastavni dio javnog poziva.

##### **Član 9. (Okončanje započetih postupaka)**

Postupci koji su započeti prije stupanja na snagu ovog Pravilnika, okončat će se po proceduri propisanoj ovim Pravilnikom.

#### **V – PRELAZNE I ZAVRŠNE ODREDBE**

##### **Član 10. (Stupanje na snagu)**

(1) Ovaj Pravilnik stupa na snagu osmog dana od dana objave u „Službenim novinama Kantona Sarajevo”.

(2) Stupanjem na snagu ovog Pravilnika prestaje da važi Pravilnik o dodjeli sredstava iz budžeta Općine Stari Grad Sarajevo za oboljele od celijakije („Službene novine Kantona Sarajevo”, broj: 11/17 i 49/22).

**PREDSJEDAVAJUĆI  
OPĆINSKOG VIJEĆA STARI GRAD  
SARAJEVO**

**Seid Škaljić**

Broj: 02-45-\_\_\_\_\_/24  
Sarajevo, juni 2024. Godine

## **O b r a z l o Ź e n j e**

### **PRAVNI OSNOV**

Pravni osnov za donošenje ovog Pravilnika sadržan je u uvodu istog. Članom 171. stav (1) alineja 3. Zakona o socijalnoj zaštiti, zaštiti civilnih žrtava rata i zaštiti porodica sa djecom („Službene novine Kantona Sarajevo“, broj: 38/14 – Prečišćeni tekst, 38/16, 44/17, 28/18, 52/21 i 40/22) propisano je da se iz općinskog budžeta finansiraju druga prava iz socijalne zaštite, koja svojim propisima utvrđuju općine, a koja nisu utvrđena u članu 170. naprijed navedenog Zakona, kojim su propisani oblici socijalne zaštite, zaštite civilnih žrtava rata i zaštite porodice sa djecom koji se finansiraju iz Kantonalnog budžeta. Članom 26. Statuta Općine Stari Grad Sarajevo („Službene novine Kantona Sarajevo“, broj: 20/24) utvrđena je nadležnost Općinskog vijeća za donošenje općinskih propisa iz svoje nadležnosti.

### **RAZLOZI ZA DONOŠENJE**

Celijakija je imunološki posredovana sistemska bolest izazvana glutenom. Javlja se i kod djece i kod odraslih, češće oboljevaju žene, te postoji genetička predispozicija za njeno dobijanje. Jedini mogući lijek, koji osobama oboljelim od celijakije omogućava normalan život, jeste striktna i doživotna dijeta bez glutena.

Shodno naprijed navedenom, te cijeneći činjenicu da osobe oboljele od celijakije u svojoj ishrani koriste bezglutenske prehrambene proizvode, kao i činjenicu da se ovim Pravilnikom uspostavlja transparentiji sistem dodjele budžetskih sredstava putem objave javnog poziva, unapređuje sistem praćenja namjenskog utroška datih budžetskih sredstava, te definiše obaveza korisnika da dostavi dokaze o namjenskom utrošku dodijeljenih sredstava, to Općinski načelnik Općine Stari Grad Sarajevo predlaže Općinskom vijeću Stari Grad Sarajevo da usvoji ovaj Pravilnik.

### **FINANSIJSKA SREDSTVA**

Za realizaciju prava iz ovog Pravilnika, potrebno je svake godine osigurati sredstva u Budžetu Općine Stari Grad Sarajevo.

#### **STRUČNA OBRADA:**

Služba za boračko-invalidsku  
zaštitu i socijalna pitanja

#### **PREDLAGAČ:**

Općinski načelnik  
putem Službe za za boračko-invalidsku  
zaštitu i socijalna pitanja